

Ulloq 22. juni 2018 Nuummi Hans Egedep Illuani nalliuttorsiorpaluttumik katerisimaarnermi Henning Sloth Pedersenip sølviusumik Nersornaaserneqarnerani Inatsisartut Siulittaasuata Hans Enoksenip oqalugiaataa.

Asasara Henning Sloth Pedersen,

Nuannaarutigeqaara illit qaaqqusatillu sølviusumik Nersornaaserneqarnissannut maanga Hans Egedep Illuanut nalliuttorsiorpaluttumik katerisimaarnermut tikilluaqqusinnaagassi. Henning Sloth Pedersen, taamatut nersorniarneqarputit nunatsinni nakorsatut sivisuumik malunnaatilimmik tunniusimallutillu sulisimanerit pissutigalugu.

Inatsisartut Siulittaasoqarfiata sølviusumik Nersornaaserpaatsit piffissami sivisuumi annertuumillu malunnaatilimmik nunarput pillugu nersortarialimmik suliaqarsimanerit pissutigalugu.

Nunatsinnut tikeqqaarpiarputit 1979-imi Qaarsuni timelæreritut sulinissat siunnerfigalugu, tassaniinninnilu oqaatsivut quiasaariaaserpullu ilikkarlugit. Tassaniinninni aamma kalaallisut nerisassaatsinnik nerisaqarnissat pingaartitarilerpat.

Qaarsuni timelæreritut sulinerit inuunivit sivisunersaani nunatsinni sulinissavit aallarniutaannaraa. Qaarsuniit Danmarkimut uterputit nakorsanngorniarlutit ilinniarnert naammassiartorlugu. Ilinniakkat naammassigakku nunatsinnut uteqqipputit, taamanikkumiillu nunarput angerlarsimaffittut nunagilerpat, nunatsinni peqqinnissaqarfik suliffigalugu.

Århusip universitetiani inuiaqatigiit peqqissusiannut tunngasunik ilisimatusarfimmi lektoritut ilinniartitsisuusimavutit, ilisimatuussutsikkut misissuisarnikkut taamatut suliaqartartut akornanni akuerineqarlutit ataqqineqalersimallutit, taamatullu aamma ilisimatuussutsimut tunngasunik atuagassiani nunat tamalaat akornanni tutsuigineqartuni allaaserisarpassuaqarsimallutit. Taamaalillutit nunarsuatsinni

ilisimatuut akornanni nunatta ilisimaneqarneruleranaut
toqqammavisseeqataasimavutit.

Nunatsinni inuunivit sivisunersaani sulisimanikkut takutissimavat nunaqqatigilikkavit
peqatiginissaat siunertaralugu iliuuseqarsinnaallutit, taamalu nakorsiartorpassuit
nakorsiarfigissallutit toqqissisimanartittarlugu.

Nersornaaserneqarnikkut nunatsinni nakorsatut ilisimatuutullu ukiorpassuarni
sulisimanerit, oqaatsitsinnik atuisinnaanerit kulturitsinnillu paasinnissimanerit,
nakorsiartorpassuarnik napparsimasunillu sullissisimanitit nunatsinnik
nersortarialimmik sullissinertut akueralugu Inatsisartut siulittaasoqarfiata
nersorniarpa.

Henning Sloth Pedersen, Nersornaat sølviusoq una maanna Inatsisartut sinnerlugit
ilinnut tunniutiligara inuiaqatigiit sinnerlugit ilinnut qujaniarnitsinnut ersiutaagili.

Qamanga pisumik pilluarit.